

Deseti interbalkanski forum udruženja banka

Reorganizacija supervizije NA EVROPSKOM NIVOU

Skupu u Sarajevu prisustvuju predstavnici udruženja banka, članica Interbalkanskog foruma iz Kipra, Grčke, Turske, Crne Gore, Srbije i BiH

Globalna kriza dovela je do određenih promjena, odnosno do toga da se mora razmišljati o reorganizaciji supervizije na evropskom nivou, kazao je specijalni savjetnik Udruženja banaka Grčke Vasilis Panagiotidis, koji je na 10. interbalkanskom forumu udruženja banaka u Sarajevu govorio o budućnosti finansijske supervizije i aktuelne regulative u EU.

Što se tiče grčkog bankarskog sektora, kriza je utjecala i na njih, ali oni i dalje imaju dobru saradnju s bankarskim sektorom u regiji i, kako procjenjuju, više od 600 milijardi eura aktive u regiji, dodao je on.

Globalna kriza

Udruženje banka BiH domaćin je ovogodišnjeg 10. interbalkanskog foruma, kojem prisustvuju predstavnici udruženja banka, članica Interbalkanskog foruma iz Kipra, Grčke, Turske, Crne Gore, Srbije i BiH. Predviđene su brojne teme među kojima osvrt na bankarski sektor

u BiH i na stanje u bankarstvu Evropske unije u kontekstu globalne finansijske krize.

Učesnici će razgovarati i o budućnosti finansijske supervizije u Evropskoj uniji i najnovijoj regulativi, te suzbijanju pranja novca.

Izvršni sekretar Udruženja banka BiH Mijo Mišić izjavio je da je stanje u bankarskom sektoru u BiH stabilno i da su banke likvidne.

Podaci, prema njegovim riječima, govore da je u ovoj godini stanje plasmana depozita na istom stanju kao što je to bilo na kraju prošle godine, što je posljedica utjecaja krize.

"Ne bi se moglo reći da je to u samom bankarstvu posebno problematično, ali ako to primijenimo na realni sektor, na kompanije, onda je sigurno da one imaju znatno više problema s obzirom na to da su pooštrenne procedure, povećani rizici i da nema izvora sredstava kao ranije ili su ti izvori skupi", dodao je Mišić.



Mišić: Banke stabilne i sigurne

Savjetnica u Evropskom bankarskom savezu Viktorija Proskurovska podsjetila je da je Udruženje banaka BiH nedavno postalo pridruženi član tog saveza. Ovakve susrete ocijenila je korisnim za razmjenu znanja i iskustava, naglasivši da će buduća saradnja ovog saveza i udruženja banaka u regiji biti aktivna.

Upravljanje rizicima

Udruženje banka iz Turske, kako je kazala njihova predstavnica Melike Mumcu, ima blisku saradnju i dobre veze sa BiH, pa su bančari iz BiH bili u prilici posjetiti ovu zemlju i

učestvovati na edukacijama o različitim bankarskim temama. Globalna finansijska kriza imala je uticaja na finansijske i bankarske sisteme, pa i na sistem u Turskoj. Međutim, taj uticaj u Turskoj bio je prilično ograničen jer je Turska u 2001. prošla kroz finansijsku krizu nakon koje je reorganizovan bankarski sistem, javila je Fena.

Podignuti su zahtjevi u pogledu kapitala, dobro osigurano upravljanje rizicima i uspostavljena kvalitetna i jaka supervizija. "Na osnovu svega toga, možemo reći da je bankarski sistem u Turskoj danas veoma zdrav", dodala je Mumcu.